

05 FEB 1999

DR MAHATHIR BERLEPAS KE LONDON

SEPANG, 5 Feb (Bernama) -- Perdana Menteri Datuk Seri Dr Mahathir Mohamad malam ini berlepas ke London untuk lawatan kerja dua hari sebelum ke Kingston, Jamaica untuk menghadiri persidangan Negara-negara Membangun (G15).

Dr Mahathir diiringi isterinya Datin Seri Dr Siti Hasmah Mohd Ali.

Turut berada di Lapangan Terbang Antarabangsa Kuala Lumpur (KLIA) di Sepang untuk mengucapkan selamat jalan kepada beliau ialah Timbalan Perdana Menteri Datuk Seri Abdullah Ahmad Badawi.

G15 yang diasaskan di Kuala Lumpur pada 1990 bagi tujuan meningkatkan kerjasama di kalangan negara-negara Selatan akan mengadakan persidangan di Kingston, Jamaica dari 5 hingga 12 Feb.

Pada persidangan kali ini Sri Lanka akan diterima masuk sebagai anggota ke 17 perkumpulan itu.

Menteri Kewangan Tun Daim Zainuddin baru-baru ini berkata Malaysia sekali lagi akan menyuarakan mengenai kawalan terhadap spekulasi mata wang pada persidangan itu.

Katanya, perkara itu pernah disentuh pada persidangan yang sama sebelum ini dan semenjak itu keadaan ekonomi di kebanyakan negara yang menghadapi masalah serangan spekulasi mata wang masih belum pulih.

-- BERNAMA

MS RHM